



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Baukau
17 Janeiru 2020

**TDB adia julgamentu ba kazu rua tanba defensór la marka prezensa sein
justifikasaun**

“Tribunál hasai ata husu sansaun disiplinar husi KSDP”

Iha Janeiru 2020, Tribunál Distritál Baukau (TDB) adia julgamentu ba kazu rua, krime arma brankas no krime tentativu omísidiu simples ho arma brankas tanba de’it defensór ba kazu sira ne’e la marka prezensa sein justifikasaun mezmú parte sira inklui arguidu sira marka prezensa iha tribunál.

“JSMP kumprinde katak defensór husi Defensoria Públiku dalaruma infrenta impedimentu oi-oin bainhira hala’o sira nia knaar. Maibé importante tebes atu asegura katak impedimentu hirak ne’e la hases sira-nia kumprimentu sira ka obrigasaun hodi fó assisténsia legál ne’ebé di’ak no kualidade ba parte interesadu sira ne’ebé buka justisa,” dehan Casimiro dos Santos, Diretór Interinu JSMP.

Tuir agenda, iha 14 Janeiru 2020, iha oras tuku 09:30 dadeer, Tribunál Distritál Baukau marka oráriu julgamentu ba krime arma brankas ho Númeru Prosesu: 0001/19.BCBCV no parte sira ba kazu ne’e notifikadu hotu inklui defensór ne’ebé sei fó assisténsia ba arguidu iha prosesu ne’e. Maibé depoisde hein to’o oras rua nia laran, defensór refere la marka prezensa no parte ofisiais justisa husi tribunál halo kontaktu ba defensór refere maibé telemóvel mate, hafoin telefone fali ba Eskritóriu Defensoria Públiku no hetan resposta katak defeza refere laiha fátin. Juis ne’ebé prezide julgamentu tenta buka alternativa no oferese advogadu privadu ba arguidu atu bele asegura julgamentu bele kontinua, maibé arguidu deklara katak nia laiha kapasidade finanseiru atu selu advogadu privadu. Nune’e tribunál decide adia julgamentu kazu ne’e ba fali iha 25 Feveireiru 2020, tuku 09:00 dadeer.

Ba situausaun ne’e, tribunál decide hasai ata husu sansaun disiplinar ba defeza refere no dirije ba iha Konsellu Superiór Defensoria Públiku (KSDP) tanba defensór refere la justifika nia falta dala rua ona.

JSMP husu atu Konsellu Superiór Defensoria públiku tau konsiderasaun sériu¹ ba tribunál nia pedidu husu sansaun disiplinár hasoru hahalok hirak ne'e hodi la prejudika prosesu julgamentu iha futuru inklui prejudika arguidu sira ne'ebé buka justisa ne'ebé maioria povu kbiit la'ek no mai husi fatin dook.

Antes ne'e, situasaun hanesan akontese mós iha 09 Janeiru 2020, ba kazu krime tentativu omisídiu no arma brankas ho Númeru Prosesu: 0003/19. LASIC ho defensor ne'ebé hanesan ho prosesu antes ne'ebé iha kazu ida ne'e mós tribunál tenke adia hafoin tribunál no parte sira hotu hein durante oras rua. Tribunál adia julgamentu ba fali iha 16 Janeiru 2020.

Hanesan iha kazu rua ne'e, la devia defensor refere ignora nia responsabilidade tanba defensor sira iha obrigaun atu fó assisténsia jurídiku ba arguidu iha prosesu tomak tuir sira nia mandatu iha lei. *Artigu 68 (c) husi Kódigu Prosesu penál deskreve katak arguidu sira tenki hetan defensor nia assisténsia hahú iha akuzasaun to'o desizaun hetan trázitu-em-julgadu, nomeadamente atu hato'o rekursu.* Ida ne'e, reforsa ho artigu 62 (b) husi dekretu lei 10/2017 Estatutu foun Defensoria Públiku ne'ebé ko'alia kona-ba “*dezempeña defensor nia funsaun ho delijénsia no kuidadu*”.

Normalmente bainhira juis, prokurador ka defensor ida la marka prezensa iha momentu sira nia oráriu julgamentu, sira tenke justifika razaun tanba-sa la marka prezensa. Ho justifikasaun antes ne'e, bele fó tempu ba kada instituisaun bele buka ema seluk hodi substitui autor tribunál ne'ebé la marka prezensa, nune'e prosesu julgamentu kontinua la'o atu nune'é prinsipiu julgamentu simples, lalais, baratu no asesivel kontinua funsiona iha tribunál.

JSMP kontinua rekomenda atu defensor sira mantein ba uluk iha tribunál antes oras julgamentu hanesan mudansa ne'ebé iha ona hodi ko'alia uluk sira nia kliente nune'e bele ajuda sira hodi fó defeza ne'ebé tuir duni sira nia kliente nia interese.

Iha parte seluk, relasiona ho facilidade ne'ebé suporta serbisu defensoria públiku, JSMP observa katak defensor sira durante ne'e menus kareta operasionál, mákina imprime aat, menus tinta ba imprime inklui menus kombustivel operasionál ne'ebé prejudika tebes defensor sira atu fó assisténsia ne'ebé adekuaudu ba kliente sira. Ezemplu, Defensoria Públiku iha Distritu Suai iha defensor nain 3 maibé iha de'it kareta operasionál 1 hodi fasilita sira nia serbisu prinsipál hanesan ba-mai julgamentu iha tribunál inklui partisipa movél no partisipa enkontru sira.

Aleinde ne'e, kareta operasionál ne'ebé iha ho durasaun tempu liu tinan 10 ona, nune'e dala barak avaria iha dalan klaran. Ezemplu, julgamentu movél foin lalais iha Tribunál Distritál

* Atribuisaun Konsellu Superiór husi Defensoria Públiku, artigu 35 (a) husi dekretu lei 10/2017 kona-ba Estatutu foun Defensoria Públiku.

Oekusi, karreta defensór nian avaria iha dalan klaran tanba kondisaun tuan ona no laiha osan ba manutensaun.

Tanba ne'e, JSMP ejize ba Ministériu Justisa atu fasilita transporte operasionál ne'ebé suficiente ba Defensória Públiku inklui osan manutensaun, mákina, tinta ba imprime, inklui facilidade sira seluk hodi fasilita defensór sira nia serbisu.

Kazu rua ne'ebé adia prezide husi juis Dra. Florencia Freitas no Dr. José Quintão Soares Celestino no Ministériu Públiku representa hosi Dra. Remizia de Fatima da Silva. Enkuantu arguidu hetan defeza husi Dr. José Maria Caetano Guterres hosi Defensór Publika maibé la marka prezensa.

Atu hetan informasaun kle'an liu tan favor kontaktu:

Casimiro dos Santos

Diretór Interinu JSMP

E-mail: santos.cas76@gmail.com | casimiro@jsmp.tl

Website: <http://jsmp.tl/>

Telefone: 3323883 | 77257466